

Sekapur Sirih



Mohamed Noh Daipi
Pengarah
Pusat Bahasa Melayu
Singapura

Penerbitan **DIAN BAHASA** merupakan satu lagi inisiatif Pusat Bahasa Melayu Singapura (MLCS), Kementerian Pendidikan Singapura untuk terus membina keupayaan warga pendidik bahasa Melayu menjalankan kajian dengan mengasah pemikiran, meluaskan bacaan dan berkongsi dapatan serta pandangan dengan rakan pendidik yang lain. Dalam usaha ini, Dian Bahasa berfungsi sebagai wadah untuk para pendidik bahasa mengembangkan bahasa Melayu sebagai bahasa ilmu, sementara membangun budaya keilmuan dan berkembang bersama-sama sebagai satu komuniti perguruan.

Lantas, Dian Bahasa menyediakan peluang untuk semua guru Bahasa Melayu termasuklah Guru Pakar, Guru Peneraju, Guru Kanan dan juga pensyarah untuk menyumbang pengetahuan yang bernas, dan hasil kajian yang dijalankan dalam bidang pendidikan yang berkaitan dengan pengajaran dan pembelajaran bahasa Melayu di Singapura khususnya dan perkembangan bahasa Melayu dalam konteks yang lebih luas lagi umumnya.

Gagasan **DIAN** mencerminkan aspirasi dan wawasan kita sebagai guru bahasa Melayu. Gagasan **DIAN** mewakili **d**aya kita untuk menajamkan akal fikiran menerusi bacaan dan kajian serta mengukuhkan ikhtiar kita untuk meluaskan dan mendalami **i**lmu, meningkatkan kemahiran demi membina keupayaan sebagai guru Bahasa Melayu yang berkesan dan cemerlang. Daya dan ilmu inilah yang membentengi **a**spirasi kita yang andal untuk terus melestari dan membangun bahasa, budaya, peradaban dan kesusasteraan Melayu berasaskan **n**ilai-nilai agama, masyarakat, negara dan kemanusiaan.

Semoga **DIAN BAHASA** akan terus bersinar dan menerangi akal budi kita serta menjadi wadah bagi para guru meraih pengetahuan dan pemangkin usaha ke arah pengajaran dan pembelajaran yang berkesan di bilik darjah untuk memupuk anak didik kita menjadi insan Arif Budiman.

Wassalam.